

# d' Aufblattler Tanzherrn - Rud

Rudenkirtag Sierning Faschingdienstag 21.2.2023



<p>Grüaß Euch Gott, liabe Leut, is wieder Aufblattler-Zeit. Mir tan leider net liag'n, Zehntausend Leit gibt's bald in Siagn. A paar san scheena, a paar schiacha. Viel weniger hat Waldneukircha. Zwoatausend-zwoahundert auf Dauer, doch de san wenigstens zan braucha.</p>	<p>In Aschach, so hat ma ghert, is mitn Wasser was ungeklärt. Da Burgamaoast Hubert Kern, muas nun endli aktiv wern. Des Wassa fäult gar grausli, drum gibt er des Motto auss: „Willst gsund bleibn, sauf Bier und Wein,“ für'd Michlbaun kunts ewig so bleibm.</p>
<p>Da neichi Buagamoasta z' Siagn, hört si gern red'n, mir tan net liagn! Nur oans, des g'hert a weng beklagt, dass er stets des selbe sagt. Wia a Roboter in „Dauer-Schleif'n!“, es is schwar nur zu begreifen und mah fragt si voller Graus: „WO schalt' ma den Mann nur aus!“</p>	<p>Da Bua van Wirtshaus „Halusa“ – na, der is bei Gott koa „Looser“! Er hat a Gerät erschafft, was selbständig a „Oa-Speis“ macht. Und des si va alloa dann reinigt – so wird da Arbeitsweg beschleunigt! Des warat wos für'n Forsthof-Wirt, dass dort amoi a weng wos g'schiacht.</p>
<p>Da umtriebige „Weiermoar“, der „trankelt“ ab und zua a paar! Nach seiner Feier zum „Konsulent“ hat dann de Nacht ban „Hack-Wirt“ g'endt. Nachdem si' da „rauschige Sepp“ van Traunviertler Stüberl hat „uma“ g'schleppt. Ma woaß net, ob der, der'n „g'fund'n“ hat, bis heut des überwunden hat.</p>	<p>Ja, da Hundsberger Bert macht Karriere, wia si's g'hert! Ob Rudenobmann, Ehrenbürger, er is da Siagna „Über-Flieger“. Dazua nu Vize-Buagamoasta und wird schee kloaweis oiwäu foaster. Zan Ökonomierat hat's net g'reicht, weil er de Stall-Oabat so scheucht.</p>
<p>'S Parlament des hab'n s' saniert und auf Hochglanz jetzt poliert! Ois is blitzblank und strahlt, dass selbst in'n Sobotka guat g'fallt! Das elitäre „Haus von Welt“ schaut aus wie aus dem Ei gepellt und konkurriert ganz friedvoll-edel mit'n Sobotka sein „Eier-Schädel“.</p>	<p>In Schiedlberg und Adlwang wird verzweifelt gsuacht schau lang nach Amtsleiter und -innen – gibt vü zu wenig von ihnen. Kinna muass ma da ned vü! Bis drei zähl'n steht im Job-Profil. Wants mehr wissn woits zur Sach, fragts oafach ban Ömmer Hans nach.</p>
<p>In da Waldneikirchna Gmoa, Sprudeln die Steuern jedes Jahr. Drum fliagt da Gemeinderat, nach Barcelona auf a paar Tag. Dort wird anscheinend Sightseeing gmacht gsofn, gfeiert und vü glacht Neikircha is a Schlaraffenland Ja Reichtum is koa Schand.</p>	<p>Autofahrer, mehr und mehr, werd'n jetzt zog'n aus'n Verkehr! Gar net weng, is' net g'log'n, werfen „ei“ harte Drog'n! Beim Fahrtüchtigkeits-Test stellt ma immer mehr fest: „Schwindliche“ gibt's überall – net nur in Siag'n oder Bad Hall.</p>

<p>Jedn Tag a guate Stund  geht d Lovrec Eva mitn Hund,  neulih tuats es sakrisch schrecka,  war des Viech auf oamal wegga,  mit der Leine in der Hand,  zweiflts scho an ihrn Verstand,  nur der Hund, hauma ghert,  der war in Vorhaus eingesperrt.</p>	<p>Liabe Leut', sperrt's auf de „Loser“!  Da Mann va da Irene Moser  is', wia ma woaf, jetzt in da Rent'n!  Wie wird des für d' Irene enden,  huckt er de mehra Zeit im Haus.  Des halt' de Guadi G'WISS net aus!  Bevor s' mit Werner dahoam wos macht,  da oabat s' liaba TAG und NACHT.</p>
<p>In Leopold Ritt sei Frau, die Traudi,  hat g'habt am Pfarrball mords a Gaudi!  Da Poid, wia kunnterts anders sei,  er war sau-müad und er schlaft ei –  z'erscht am Tisch, dann am „WC“.  Sie muass'n aufwecka, koa Schmäh!  Is' in eahn Bett genau so fad,  halt' d' Traudi g'wiss nimma lang "stad".</p>	<p>Käferlarven, Fleh und Maden  kinnan dem Magen g'wiss net schaden.  A Zecken, Schmeißfliag'n und Grill'n  kann ma problemlos vertilg'n.  Die EU, sie empfiehlt:  Verzicht's auf Sau-Fleisch, Fisch und  Wild! Es wird nimmer lang dau'n  werd'n ma „Sack-Scharten“ kau'n.</p>